

# বিদেশি দক্ষ লোকজনের পিছনে বছরে ৪ বিলিয়ন ডলার চলে যাচ্ছে দক্ষতা প্রকল্পের উদ্বোধনীতে অর্থমন্ত্রী

## ■ ইজেক্টাক রিপোর্ট

অর্থমন্ত্রী আবুল মাল আবদুল মুহিত বলেছেন, বাংলাদেশে দক্ষতার অভাব রয়েছে। তাই বিভিন্ন কাজে বিদেশ থেকে দক্ষ লোকজন আনতে হয়। তারা কাজ করে প্রতি বছর চার বিলিয়ন ডলার নিয়ে যাচ্ছে (রেমিট্যান্স আউটফ্লো)। আমাদের শ্রমিকদের দক্ষতা বাড়তে পারলে এ পরিস্থিতির পরিবর্তন হবে। গতকাল সোমবার রাজধানীর একটি হোটেলে বাংলাদেশ পার্মেন্ট ম্যানুফ্যাকচারার্স অ্যান্ড এক্সপোর্টার্স এসোসিয়েশন (বিজিএমইএ) আয়োজিত অনুষ্ঠানে প্রধান অতিথির বক্তব্যে তিনি একথা বলেন। এশীয় উন্নয়ন ব্যাংকের (এডিবি) অর্থায়নে দক্ষতা উন্নয়ন প্রকল্প 'স্কিল ফর এমপ্লয়মেন্ট ইনভেস্টমেন্ট প্রোগ্রাম' এসইআইপি-এর উদ্বোধন উপলক্ষে এ অনুষ্ঠানের আয়োজন করা হয়। বিজিএমইএর ভারপ্রাপ্ত সভাপতি এসএম মাদান কচির সভাপতিত্বে সভায় বক্তব্য রাখেন এফবিসিসিআই'র প্রথম সহ-সভাপতি শফিউল ইসলাম মছিউদ্দিন, এডিবির টিম লিডার ব্রজেশ পাল, এসইআইপি প্রকল্পের পরিচালক জালাল আহমেদ, বিজিএমইএর সাবেক সহ-সভাপতি সিদ্দিকুর রহমান, সহ-সভাপতি রিয়াজ বিন মাহমুদ প্রমুখ।

অর্থমন্ত্রী বলেন, দক্ষতা উন্নয়ন ছাড়া আমাদের অর্থনৈতিক কোন স্বপ্নই বাস্তবায়ন করা সম্ভব হবে না। তাই দক্ষতা উন্নয়নের এ প্রকল্প বাস্তবায়নে অর্থ মন্ত্রণালয় এগিয়ে এসেছে। তিনি বলেন, এ প্রকল্পের আওতায় বিভিন্ন মেয়াদে মোট ২ লাখ ৬০ হাজার জন প্রশিক্ষণ পাবেন।

এফবিসিসিআই সহ-সভাপতি শফিউল ইসলাম মছিউদ্দিন বলেন, পার্মেন্টস খাতের রপ্তানি ৫০ বিলিয়ন ডলার করার যে লক্ষ্যমাত্রা নির্ধারণ করা হয়েছে তা বাস্তবায়নে দক্ষ শ্রমিক খুবই প্রয়োজন। তা করতে পারলে পোশাক খাত থেকে ৬০ বিলিয়ন ডলারও আয় করা সম্ভব।

এসএম মাদান কচি বলেন, পোশাক শিল্পে বর্তমানে ২৫-৩০ শতাংশ দক্ষ শ্রমিকের অভাব রয়েছে।